



SHAVEI

ISRAEL

Weekly News Bulletin for Bnei Menashe in Mizor

Hqrs. : 58 King George St. Heichal, Jerusalem, Israel

PARASHAT : VAYISHLAKH

December, 2008/ Kislev 5769- Vol. 3 - No. 196

RINNA (FAITH) - II

— Rav Yehudah Gin

- 1 Rinna hi khawngaih thilpek (*charity*) tluka pawimawh a ni.
- 2 Khawngaih thilpek atangin rinna alo chhuak a (*hemi inngahna hrethiam tur chuan Zohar thukhawchang hriat hmasak a ngai awm e : Mi tu pawhin a felna avanga nungdama awm angin a inngai tur a nilo, P-thian ngilneihna vang luai luai zawka nungdama awm a ni tih a hre tur a ni. Kan chenna khawvel hi P-thian khawngai thilpek vanga lo awm a ni a, chuvangin, tun thlenga nungdama kan awmna chhan hi Lalpa khawngaih thiltlawn pek a ni. Heta tanga kan zir theih chu, Lalpa laka khawngaih thilpek kan dawn avangin Amah chu kan ringa, kan lawm bawk a ni. Chuvangin, rinna kawnga dinhmun sang zawk kan rah theihna turin keini pawhin khawngaih thilpek hi kan uar tur a ni a, chutih rualin kan sakhaw mithiamte chuan hmangaih ngilneihna hi kawng thumin khawngaih thilpek aiin a ropui zawk tiin kawhhmuhna an siam leh bawk a ni.*)
- 3 Rinna chuan finna a siam a, rinna avangin miin P-thian hmangaihna leh tihna a nei thin, 'Lalpa tih chu finna bul a ni' tih ziak a ni si a.
4. P-thian kan ring phawt anga tichuan zawi zawin chu rinna rah chuan hriatthiamnaah min hruailut dawn tihna a ni.
5. Khawlohna chuan P-thian rinhlelhnaah mi a hruai thin a, mi sual chuan P-thian a hlat thin avangin A kawngte a man fuh thei lova hei hian P-thian rinlohnaah a hnuklut thin a ni.
6. Rinna hi ngawi rengin emaw zawi dam dapin alo piang thei a, mahni chungah thilthleng pawmthiamna hi P-thian rinna atanga lo chhuak thei a ni.
7. Thikthu avangin miin rinna kawng a pensan/tlakniam phah thin, rinna tlakchham avangin thikthu a chhe thin, a chhanchu a chanvo atana P-thian ruat chu a pawm duhloh avangin a thikthu alo chhe ta thin a ni.
8. Rinna tlachham mi chuan Torah thute a ngainep thin, Torah ziarang bulthut chu 'P-thian thuawih' a ni a, miin rinna a tlakchham chuan Torah thute chu a pawm duh hauh lovang.
9. Miin rinna a tluksan chuan chunglamin a chungah ro a rel sak dawn tih a hre tur a ni.
10. Rinna kawnga mi beidawng chu ala tap ang. *(contd/- p- 2)*

THU AWMTE

RINNA (FAITH)-II
- Rav Yehudah Gin (p-1)

DEREKHERTZ-VII
— Liyon Fanai (P- 1 & 3)

KUMPAWIMAWH (CONTD)
— Avidan Moris Ilan (P-3)

PARASHA - VAYISHLAKH
— SNN (p -1 & 2)

SHAVEI & LOCAL NEWS
— SNN (p - 4)

MIZORAM GENERAL
ELECTION —SNN (p - 3)

ETIQUETTE
— SNN (Page - 3)

DEREKH ERETZ - VII

— Liyon Fanai

'Mihringin a tih makmawh chu thenawm khawveng tha nih hi a ni' (*Pirkei Avot 2:13*), tiin kawhhmuhna a awm a. Thenawm khawveng tih hian mahni in bul hnaia chengte chauh a kaw lova, hmundanga cheng i hmuh fo te leh i kawm thinte thlengin a huam a ni. Thenawm khawveng tha ni tur chuan sum leh tha a midang tanpui tura inpeih reng mi nih a ngai a, midang laka hlawkna beisei lova, min i lakah eng hlawkna nge an dawn ang tih ngaihtuah mi nih a ngai bawk a; mi lungngaihna tawmin an tawrhna tizual thei zawnga chet loh te, midang chungah thinur hmaisena an chiam te hi chin loh tur a ni.

Thenawmte nena inkungkaihna a that avangin an inah kan lenglut chamchi kher tur tihna a nilo, mi nin kan hlawh thuai thei a ni. "I thenawm in tlawh *(contd/- p- 2)*



PARASHAT : VAYISHLAKH

Gen. 32:4—36:43
HAFTARAH : Obadia 1:1—21
— Itzkhak Colney

Kan Pa Ya'akov-a chu kum 22 chung zet Lavana (*Rivka-i unaupa*) bulah *Galut* a, a awm hnuah, a nupui fanaute nen Israel ram lam panin an hawng a. Ya'akov-a chuan a nupui Leaii leh Rakili leh Zilpa leh Bilha lak atangin fa 12 a nei tawh a. Hausa takin, ran rual tam tak, Beram rualte, Sanghawngsei rualte , Sabengtung rual te leh Chhiahhlawh (*bawih*) tamtak nen Ramthianghlim lam a pan a ni.

Ya'akov-a chu a u Esaiv-a nen an intawk ngei dawn a, a u malsawmna alo dawn khalh vanga a u thinrim thawidam turin thilpek tamtak a thawn hmasa a. Chutia thilpek pe tura mi a tirh hnu chuan Ya'akov-a chuan '*Nakhal Yavok*' hmunah a nupui fanaute leh ranruul nen an chawl a. Chumi hmun atang chuan let leh in a sulhnu a chhuilet a, tichuan, amah chauhva a awm lai chuan, mi Pakhat ranvengtu ang deuh hi..... *(contd/- p- 2)*

PARASHA.....chhonzawmna

a hmu a, amah chu a rawn bei ta a, chumi nen chuan ni chhuah dawn thlengin an inbuan ta a. Ya'akov-a inbuanpui, mi danglam tak hi tunge ni ta ang? *Khazal (Torah Mithiamte)* chuan he mi hi vantirrhkoh a ni e, a ti a. Vantirrhkoh chuan Ya'akov-a a hneh lova, ni a rawn chhuah dawnah chuan Ya'akov-a hnenah chuan thlah turin a ngen a, ani chuan a remti lova.



A pa Itzkhak Avinu hnen atanga malsawmna a dawn kha Esaiv-a ta tur nilova, ama malsawmna dawn tur ani tih thlenga finfiah a ni duh a ni. Tichuan, Vantirrhkoh chu amah malsawm turin a ti a, vantirrhkoh chuan a malsawm ta nge nge a ni. Midrash in min zirtir danin hemi zana thilthleng – zankhua a an inbeihna kha, Israel te *Galut* (rampawn)-a an awm entirna niin, hun harsa tak - thim tak leh zan ang a ni, tiin.

Hnamdangte chuan engtiklai paw'n min tihnat an duh thin a, hlawhtlin chang an nei ve bawk thin. Mahse hetiangin a ni reng bik dawn lo . A chhan chu “Khua a lo en” tih hian “Tlanna famkim” leh “Mashiakh lo lan” hun a entir a ni. Chumi hunah chuan hnamdangte chuan Israel fate paw' an khawihna turin chakna reng an nei tawh lovang.

Member pui duh tak te u, tun hun hi khawvar dawn a ni tawh a, harsatnate chu a rawn pung zel ang, khawthim lai ber ang a ni. A hnuah êng a lo lang anga chu êng chu chhandamna famkim a ni tawh ang. Ya'akov-an Esaiv-a vantirrhkoh a hneh ang khan, chutiang bawkin Israel fate chuan kan hmelmate chu kan hneh ngei dawn a ni.

Chumi ni rawn herchhuah tir thuai tur chuan, rinna nghet- der thawng lo, kan neih a ngai a ni. Rinna chuan chakna min pe a, nggak a tuar hram hram chungin, thil thalo do zo ngei tur leh chhel taka *Mashiakh* lokal nggak hram hram tur kan ni. “*Ani mamin be Emuna shl'ema beyavo ha'Mashiakh veaf alpi sheyitmame a, im kol ze akhake lo*”, ti a hla kan sak thin ang hian beidawng mai tur kan nilo. *Shabbath Shalom*.

BRIT MILLAH HRIATTIRNA

Brit Milla (serhtan) runpui Aizawl Community hruaitute'n an buatsaih dawn a, tunah hian serhtan thiam Pu Y. David'n mi chenchilh mek a, 14th December, 2008 (Sunday) hian a duh apiang tan Shavei Israel Centre-ah serhtan theih a ni ang.

Pu Y. David-a hian sakhaw thil avanga serhtan duhte chu man bituk awm lovin an phal ang tawk dawng tura a inpeih thu a sawi a, mahse serhtan nana hman tur, damdawi, syringe, etc. neuh neuh a awm avangin Rs. 300/- tal hum theuh turin community hruaitute chuan ngenna a siam a ni. Hetiang hun remchang hi avang hle a, ngaihven a tha hle.

RINNA (FAITH) - II.....chhonzawmna

- Rinna tluksantu chuan zauthauna lam mumang a nei thin, nundan uchuak leh danin a khap thil (*illicit thought*) a ngaihtuah thin a, milem biakna (inngahna dang) thlengin a ngaihtuah thin a ni. Hmanlai atang tawhin mipat hmeichhiatna uchuak hi milem biakna nen a inkungkaih hle a, *entirnan* : Mosia hunlaia Median hmeichhiate leh Israel fate chungchangah pawh khan kan hre thei awm e. Tin, hmanlaia Hinduism zirtirnaah paw'n mipa leh hmeichhe inpawl lai lemte an be thin a ni.
- Rinna atangin miin P-thian nihna an hrethiam thin. Rinna kaltlangin miin P-thianah an in pumpek thin a, hei hian P-thian nen inzawmna a siam thin a ni.
- Rinna avangin miin amahah P-thian rinna ziarang a lanchhuah tir thin.
- Rinna avangin miin P-thian ngaihdamna an chang thei a, rinna satliah te, simna dik neilo leh thiltha tih tlakchhamna chuan sual tlenfaina a hlawhchhuak thei lova, nimahsela a tlangpui thu chuan hengte pawh hi rinna kailawn bulthut a ni tho.
- A chang chuan mimal rinna atân P-thianin hrehawmna leh harsatna a thlen tir thin a, hei hi a tuartu tana tlakchhiatna tur a ni lemlo.

DEREKHERETZ - VII.....chhonzawmna

chew lutuk suh, a ning ang chia, a haw dah ang che' (*Thuf. 25:17*) tiin kan hmu bawk a ni. *Rashi* pawhin, khawizu ei nasat lutuk hian luak a tichhuak thei, a tih angin mi ina lenluh nasat lutuk chuan in neitu lamin min haw thei a ni tih hi hriat a pawimawh hle a ni.

Inhmuh loh vâng vâng te hi inlaintatna tizualtu a ni, tiin *Metzudot David* pawhin alo tarlang ve bawk a ni. In hmuh zin lutuk hian in chhangkham a awl a, him tawk atanga inkawm hi kan zir fo a tha hle. A chhanchu mihring pianken (*instinct*) hrim hrimah hian mal tlat duhna a awm a, inchiahpiah lutuk hi chuan ninawm lamah a kal thuai thin. Zalen leh mitmei veng lova awm duhna a awm thin avangin inchiahpiah leh inhriatchian lutukna te hian in huatna a hring thuai thin. *Midrash* chuan in ninna hi nupa karah pawh thleng thei a ni a, chuvangin Torah dan pawhin hetiang pumpelna turin nupa kara hunbi neia inlak hran hun a bituk nghe nghe a ni.

Ni. Ruth Klein (*a cham rei tawh a Ni. kan ti ta vel a ni*) Aizawl a cham chhungin community thalai leh naupang hnenah zirtirna a pe thin a, community thalaite'n an tangkai pui hle a, an ngaina in, an ui hle a ni. An lawmzia lantir nan thilpek hrang hrang an pe a, amah thlahna programme hlimawm tak buatsaih a ni nghe nghe. Dt. 10/12/08 khan Zoram a chhuahsan a, Pu Jeremiah In, Zuangtuiah ipte pui a bâng a, a cham chhung zawngin inpuiah a hmang nghal bawk a ni.



Ruth Klein
from BethEl

**KUM PAWIMAWH LEH HRIATVE MAI MAI ATAN**(Chhonzawmna..) — *Avidan Moris Ilan*

5. Sodom leh Gomorah khua tihboral, tihchhiat kha Bible kum chhiarin kum 2048 a ni a, 1713 BCE a ni. Hemi kum vek hian kan pu Isaac Avinu in khawvel êng a hmuh kum baw k a ni.
6. Kan pu Abraham Avinu in a fapa halral thilhlán atana, hlan a tum kum chu Bible kum chhiarin 2048 a ni a, 1677 BCE a ni. Hemi kum vek hi kan pi Sarah Imanu tih kum a ni baw k.
7. Kan pu Yiacov Avinu leh Esauva pian kum chu Bible kum chhiarin 2108 a ni a, 1653 BCE a ni.
8. Kan pu Abraham Avinu in a thlarau a thlah a, khawvel taksa a kalsan kum chu Bible kum chhiarin 2123 a ni a, 1638 BCE a ni.

Adam atanga Yacov thlengin

Hming	Damchhung	Pian kum	Thih kum
Adam	930	1	— 930
Setha	912	130	— 1042
Enosh	905	235	— 1140
Kenan	910	325	— 1235
Mahalalel	895	395	— 1290
Yered	962	460	— 1422
Enocha	365	622	— 987
Mathuselah	969	687	— 1656
Lamecha	777	874	— 1651
Noacha	950	1056	— 2006
Shema	600	1558	— 2158
Arpachshad	438	1658	— 2098
Shelah	433	1693	— 2126
Eber	464	1723	— 2187
Peleg	239	1757	— 1996
Reu	239	1787	— 2026
Seruga	230	1819	— 2049
Nahora	148	1849	— 1997
Terah	205	1878	— 2083
Abraham	175	1948	— 2123
Isaaca	180	2048	— 2228
Yacova	147	2108	— 2255

Pian kum leh thih kumte hi chu Jewish kum chhiar dana dah vek a ni. Mizo Bible-ah hian an pian kumte nen hmuh tur a awm lem lova, chuvangin zir chiang duhte tân tangkaina a awm mial takin tihchhuah a ni e.

**AIZAWL LEH SIALHAWK COMMUNITY
HRIATTIRNA LEH NGENNA**

Shavei Israel Organisation hnuai a awm Zoram Bnei Menashe chuan tunhnaia Shavei Israel Organisation do leh ep zawnga hmalakna leh Shavei Israel hruaitute hmalakna tithuanawp zawnga chetna thawm awm mek hi a demin a do tlat a ni.

Tin, Shavei Israel Organisation hnuai a awm Zoram Bnei Menashe member ni mekte pawhin mahni laina hnai hetiang hmalatute hi thlawp lo tur leh do ngam turin a ngen nghal baw k che u a ni.

Hetianga hmalakna avanga nakin hnuai a awm Zoram Bnei Menashe member-te zingah nghawng alo awm a nih pawhin Zoram Bnei Menashe hruaitute'n mawh a phur lovanga, tumah indem theih a ni lovang.

**6TH MIZORAM STATE GENERAL
ELECTION CHUNGCHANG**

Mizoram State 6th General Election chu December ni 2 2008 khan zawh fel a ni ta a, tin, December ni 8 khan harsatna awm lovin ralmuang takin vote pawh chhiar zawh a ni ta. Inthlan hi MPF hmalakna avangin tunhma anga ri bung bung kha a awm tawh lova, electronic media lam hmasawmna avangin inthlan lai leh vote chhiar laite chu mipui hmuh theihin an cover hneh hle a ni. Aizawl atang chuan thingtlang live in hmuh a ni lem lo. Inthlan dawn zan thlenging boruak a reh duk mai a, engemaw thlipui zawng a tleh mek a ni tih chu mi tam tak rindan a ni a, he rindan hi December ni 8 khan a taka hmuh leh hriat theihin alo awm ta a ni. Rorel lai party nin-na (*anti-incumbency factor*) emaw Anti MNF Wave a thawk nasa hle niin a langa, rorel lai leh Chief Minister ni mek Pu Zoramthanga bakah MNF hruaitu lawk tak takte chu an tla phawk phawk mai a, result puan ni la la hian Chief Minister chuan Mizoram Governor hnenah banna a theh lut nghal nghe nghe a ni.

Mizoram hian constituency (seat) 40 a awm a, Congress in seat 32-ah hnehna a chang a, rorel lai chuan seat 3 an chang ve taw k a, an thawhpui pakhatin seat khat a chang baw k. UDA chuan Pu Lalduhoma leh Brig. T. Sailo tiamin seat li (4) an chang ve baw k a ni.

Vote tla zawng zawng hi 81.11% a ni a, Congress party hian seat 80% an hui a ni. Mizoram Legislature Assembly-ah hmelthar 19 (*first timer*) hmuh tur an awm dawn a ni. Congress party mipui hlapui, 'Kutphah mawi' leh 'Engahnge kan Congress loh lem ang le?' tiin an chai mup mup mai. Rokhawlhna dang a awm loh chuan Ministry thar tur hi ninganiah (11 Dec.) lakluh hman beisei a ni a, zirtawpniha MLA tharte thutiam tira lakluhna neih beisei a ni baw k.

Chutih mek lai chuan, candidate tla te hian vote tla zat chhinchhiah leh Electronic Voting Machine (EMV) a result lo chhuak a inmil lo tiin, Election Department hnenah hrihlfiahna an phut mek baw k a ni.

HMANGCHANG (ETIQUETTE)

'Shalom' tiin chibai kan buk thin a, 'Shalom' boruak lantir a pawimawh hle, hawihhawm kan duh em em laiin hawihhawm dan dik kan lantir thiam leh silova, chuvangin fimkhur a tha hle.

'Shalom' ringawt hi midang laka hawihhawmna lantirtu a ni hran lo, kalkawng lo in ken te, an din ruala din a, an thut huna thut nachang hriatte hi a tha khawp mai. Chibai min buk tu chu ding chung a chhanlet hi a mawi a ni. Tin, mi i chibai in lehlam hawi emaw midang be chungin i chibai liam mai mai tur a nilo.

Inleng kan thlahin ding chung a thlah emaw in atanga zuichhuah hi tihdan mawi a ni. Motor a neitu khalh a chuang i nih chuan a bula thut chu a mawi a, tin, na taka motor kawngkhar khar bur hi a mawi lo, ram thenkhatah chuan thinrimna lantirtu a ngai thin.

Mi motor a chuang i nih chuan lawmthu sawi theihngihlil suh, an thil phurh ngaihven pui nachang hre baw k ang che. Mi motor chhunga thil i ei/in chuan a ningnawi tha taka funin chhuahpui hi tihdan mawi a ni baw k. Mi i biak lai ngaihsak la, mi inbiak lai be buai lo turin fimkhur rawh.



CENTRE & LOCAL NEWS

Dt. 7th Dec., 2008 Khan Mizoram Shavei Israel Centre chu Ralphy Jhirad-a kaihruai Switzerland, Germany, Israel leh Ja-maica atanga lokal Jews mi 23 te'n an rawn tlawh a. Hemi ni la la a thlawk chhuak leh tur an nih avangin, shakharith zawh hnuah Centre an rawn tlawh a, Centre incharge Pu Liyon Fanai leh Pu Jeremiah Hnamte pawh rang takin Centre a pan nghal a, zawhna leh chhanna hun reilote an hman hnuah, zaia inkawmkhawmna hun reilote hman a ni. Centre rawn tlawhtute zinga pakhat, Poultt Unb Gecko Kausmann chuan Shavei Centre a zirlai hmeichhe naupang pakhat, Zemirah Parte (*hetih lai taka naupang awmchhun*) chu a lehkha zirna tur senso zawng zawng tum sak vek turin a tum a sawi a, chanchin kimchang hrilh zel turin a duh a, hemi enzui tur hian Pu Jeremiah Hnamte leh Liyon Fanai te hnenah mawhpurhna a hlan nghe nghe a ni.

Centre inlengte hi 3rd Dec., Khan Zoram anlo lut a, Pi Zaithanchhungi leh Pi Elisheva te'n an buaipui ni a thudawn a ni, Be'er Miriam Mikveh an tlawhpui nghe nghe. Heng mikhualte chungchangah hian Israel lama kan hotute thu dawn a nih loh bakah Shavei Israel Centre hruaitute contact a nih loh avangin centre hruaitute'n an chiauu lem lova, nimahsela, inlengte ngenna angin Pu Jeremiah Hnamte leh Pu Liyon Fanai te'n Lengpui Airport thlengin an thlahliam a ni.

□ Dt. 7th Dec., 2008 Khan Shavei Israel Centre hruaitute bakah Shavei Fellow leh Aizawl Community hruaitute chuan joint meeting an nei a, he meeting-ah hian Khanukah hmandan turte, member thar lakluh dan tur te, Judaism pawl dang atanga Aizawl Bnei Menashe Community lakluh dan turte an rel a ni.

□ 21st Dec., 2008 tlai atanga intana ni riat (8) chhung aw h tur Khanukah Kût chu Aizawl Bnei Menashe community chuan ruai nena lawm nise tiin a rel a, hemi atan hian member leh chhungkaw tin te'n inhawng taka inpuahchah theuh turin ngen kan ni. Khanukah hi hlimna kût a nih angin chhungkaw harsa ber pawhin hlim taka an hman ve theihna turin rilru a midang kepna thinlung pu chung a thawhlawm thawh theuh turin hruaitute chuan community mipuite an ngen tak meuh meuh a ni.

Community mipui inpumkhatna atan anih mai bakah, krismas boruak sosan lai a nih dawn baw avangin community thalaite leh naupang te'n krismas boruak inlumlet avanga aw hna leh pawnlam boruak hip lova Khanukah hlimawm tak an hman ve theihna turin rilru i siam theuh ang u.

Tin, Aizawl community hruaitute chuan Khanukah ruai buatsaihna atana chhungkaw thawhlawm bituk tur zat chhui turin chhungtin tlawhchhuah hna an thawk mek baw a ni. Community hruaitute an ngaltha a chak tha hle a, kitin kiltang an tlawhchhuak nghal zung zung mai a, an fakawm hle a, community member te'n lo tawiam hram hram i tum ang u.

□ Pu Jeremiah hnamte pawh a mimal tulna avangin Kolkata a kal thut a ngai a, hemi remchang hmang hian Australia atanga lehkhabu thawhkhawm (*donated books*) tuna Kolkata a awm mek a ngaihven pah dawn a ni. Heng lehkhabu te hi, Mizoram, Manipur leh Bangalore tana thawnkhawm a ni a, Mizoram atanga thawnchhuah leh tur a ni. Shavei Israel Hebrew Centre Office tur siam zawh a nih vele Library a dah tur a ni a, mumal taka enkawl zui tura ruahmanna siam mek a ni.

□ Aizawl Bnei Menashe Community member te'n Shiddur inang lo pui pui kan hum fur hlawm a, chubakah neilo tam tak kan awm baw avangin kan tawngtai dan pawh a rualkhai lo hle mai a. Chuvangin, community hruaitute leh Shavei fellows joint meeting chuan Shiddur bu thar buatsaih mai nise tiin thutlukna a siam a, tunah hian bawhzui hna kalpui mek a ni. Mamawh tute'n rawn inhriattir thei ula a lawmawm hle ang.

□ Shavei Israel Org., Jerusalem chuan calendar a buatsaih leh mek a, reilote hnuah kan dawn thuai ring ila, a duh duhin an lakdarh mai mai tawh lohna turin mumal zawk a sem a ni tawh ang.

DAWN TI SEI

Mi i sawisel emaw hnialin tawngkam nem hman hram tum rawh.

Mahni nu leh pa biangbiak dawnin tawngkam dam leh nem tak kan hmang tur a ni.

Naupang lakah phut (demand) neih san lutuk tur a nilo, hei hian thuawih lohna khura in nawrluhna a hring thin.

Chhunglam leh pawnlama naupang tihnat hi a paw hle a, awmze nei lova naupang chung a thinur chiam thinna chuan naupang a ti hel thin.

Hmeichhe pasal nei tawh chuan ama nu leh pa te mamawh a buaipui chiam tur a nilo. A pasal duhzawng hlenchhuah chu a tih makmawh a ni zawk.

HRE VE TAWH EM LE?!

:)) A phunchiar khawp a, lottery a man thu an hrilh a, a va tul teh fo lo e aw, a ti nui vur vur.

:)) Mizoram a Rs. 500 note lem (*fake note*) lengvel hi a tak ang chiah chiah a ni a, an hriat hran theihna ber chu, Mahatma Gandhi hnunga awmte zinga pakhat hi a hur hmel deuh an ti...hahahaha

:)) Tawngkam thiamlo ve khawp a, a nu ruang chungah thu a sawi a, 'Ka nu hi a tet têt atanga ka lo enkawl tawh a nia.. te a ti vel.

:)) Fapa mal a ni a, a awm herh angreng khawp a, tukkhat chu chhung inkhawm naah dingin a nu leh pate hmaah, 'Nangni rul thlahte u, hmangaihna hi kawng thum lian tak tak pangaah a then theih...' te a ti vel.

Shavei Israel

Founder Chairman : Michael Freund
Weekly News Bulletin in Mizo/Kuki

Hrqs. : 58 King George St. Heichal, Jerusalem, Israel
Website : www.shavei.org
Mizoram Centre: Mercy Villa, Upper Republic, Aizawl, Mizoram.
Manipur Centre: B. Vengnom, Tuibuang, C.C. Pur, Manipur.

Contact mails : Israel : tzvi@shavei.org / tzvikhaute@yahoo.com
Mizoram : madinga13@yahoo.com
Manipur : kjohnphaltual@yahoo.com

Published by : Shavei Israel Organisation, Jerusalem, Israel.